



Sabtu, 11 November 2023

Ogen : Lukas 1:5



Ndehara Imam



Elisabet, e me penggelaren nandangi sekalak diberu si tersurat i bas pustaka si Badia. Kitab Lukas nuriken alu tangkas kerna kecibal kegeluhenna. Ia kesusuren imam, janah erjabu ras sekalak imam. Gelar perbulangenna Sakaria. Perbulangenna erdahin i bas paksa pemerintahen Herodes. Kesaksin Pustaka ngataken maka Herodes e me pemerintah si kejam, janah kalak Jahudi labo pernah ngaloken ia jadi raja si sah. Erkite-kiteken si e la ia senang dingen merawa ia nandangi kalak Jahudi.

Bagenda me kecibal sekelewet Elisabet i bas paksa perbulangenna jadi imam. Banci sibayangken maka kecibalna paksa si e labo nyaman, tenang jadi keluarga entah pe ndehara imam. Imam e jadi ancaman, kususna ngalaken pemerintah. Aminna pe labo mbue ituriken kerna si e, tapi kitab Lukas enda nuriken kerna paksa entah masa ia ngelai. Tersurat gelarna jadi ndehara imam. Tentuna enggo mbue peran silakonenna selaku pendamping, penampat man perbulangenna. Ipebelin-belin i bas keluarga imam, em asamna si megegeh ncibalken diri bas pelayanen bage pe bas ngalaken erbage situasi pelayanen. Itandai kalak ia ndehara imam janah sinusur sekalak imam. I bas penandai kalak e tek kita la terlepas arah kegeluhenna si ncidahken uga kin oratna kegeluhen ndehara imam. Teridah ia ndehara si siap ras setia ndampingi perbulangenna.

Elisabet selaku ndehara Imam, icidahkenna kegeluhen si sembaba ras kegeluhen perbulangen. Jadi ndehara si pentar, simaba kemalemen ate man perbulangen. Perbulangen e me imam bas jabuta, melala tantangan, ancamen sinialakenna subuk i bas jabu, pendahin bage pe masyarakat. I je me perlu kehadirenta selaku ndehara ncidahken dukungan segelah ia tetap paguh dingen setia i bas ndahiken dahinna selaku imam.

“Tetap jadi penampat si paguh man perbulangen”